

Uned Genedlaethol Troseddau Bwyd

Mae'r Uned Genedlaethol Troseddau Bwyd yn uned casglu gwybodaeth droseddol o fewn yr Asiantaeth Safonau Bwyd.

Dylai defnyddwyr fod â hyder bod eu bwyd yn ddiogel ac yn cyd-fynd â'r hyn sydd ar y label.

Mae'r Uned Genedlaethol Troseddau Bwyd (yr Uned) yn swyddogaeth benodol o fewn yr Asiantaeth Safonau Bwyd (ASB) ar gyfer gorfodi'r gyfraith. Mae'r Uned yn darparu arweinyddiaeth ar droseddau bwyd ledled Cymru, Lloegr a Gogledd Iwerddon. Mae'r Uned yn gweithio'n agos gydag Uned Troseddau a Digwyddiadau Bwyd yr Alban sy'n rhan o [Safonau Bwyd yr Alban](#).

Sefydlwyd yr Uned yn 2015 yn dilyn adolygiad o'r digwyddiad cig ceffyl yn 2013. Diben yr Uned yw diogelu defnyddwyr a'r diwydiant bwyd rhag troseddau bwyd o fewn cadwyni cyflenwi bwyd.

Mae [troseddau bwyd](#) yn dwyll difrifol sy'n effeithio ar ddiogelwch neu ddilysrwydd bwyd. Pennir ymateb yr Uned i'r twyll hwnnw trwy asesu pa mor ddifrifol ydyw. Bydd hyn yn cynnwys ystyried faint o waith cynllunio a chydlynu fu wrth ei gyflawni, effaith y twyll ar draws rhanbarthau a ffiniau daearyddol, a'r golled ariannol a niwed arall i'r cyhoedd a'r diwydiant.

Mae enghreifftiau o droseddau bwyd yn cynnwys defnyddio bwyd wedi'i ddwyn yn y gadwyn gyflenwi, lladd anghyfreithlon, dargyfeirio bwyd anniogel, difwyno, amnewid neu gamgyfleu bwyd, a thwyll wrth ddefnyddio dogfennau.

Gair i gall

Mae'r Uned Genedlaethol Troseddau Bwyd (yr Uned) wedi datblygu [adnodd hunanasesu gwytnwch yn erbyn twyll bwyd](#) i gefnogi busnesau i ddatblygu a gweithredu eu strategaeth atal twyll.

Mae'r adnodd hunanasesu yn cynnwys gwahanol feysydd y bydd angen i fusnesau fod yn ymwybodol ohonynt fel y gallant nodi a mynd i'r afael ag unrhyw broblemau mewn prosesau yn well.

Amcanion yr Uned Genedlaethol Troseddau Bwyd

Amcanion strategol yr Uned yw:

- atal bwyd rhag bod yn anniogel neu'n annilys trwy anonestrwydd
- tarfu ar droseddu a dwyn troseddwyr o flaen eu gwell
- adeiladu gallu domestig a byd-eang i fynd i'r afael â throseddau bwyd

Mae'r Uned yn chwarae rhan bwysig wrth gysylltu ar draws sawl sector ac ar lefelau cenedlaethol a rhyngwladol. Mae'n gweithio'n agos gyda'r diwydiant bwyd i sicrhau bod busnesau'n wybodus ac yn barod i wrthsefyll troseddau bwyd. Nod yr Uned yw creu amgylchedd gelyniaethus i'r rheiny sy'n cyflawni troseddau bwyd trwy ymchwilio i droseddwyr dan amheuaeth neu fel arall drwy

gefnogi partneriaid yn eu hymdrechion cyfreithlon i fynd ati yn yr un modd i darfu ar y troseddwy'r hynny.

Ymatebion yr Uned Genedlaethol Troseddau Bwyd

Mae datblygu a dadansoddi gwybodaeth o ystod o ffynonellau yn galluogi'r Uned i baratoi asesiadau strategol manwl a fydd yn nodi bygythiadau, risgiau a gwendidau.

Mae'r Uned yn gweithio gyda'r diwydiant i godi eu hymwybyddiaeth a phrofi eu systemau ymateb i droseddau bwyd gan ddatblygu eu gwytnwch er budd y busnes bwyd a'r cyhoedd.

Strategaeth Reoli

Mae Strategaeth Reoli'r Uned yn amlinellu blaenoriaethau troseddau bwyd cyfredol yr Uned, yr ydym yn canolbwyntio arnynt er mwyn atal troseddau bwyd, rhwystro ac amharu ar droseddwy'r bwyd, a dod â throseddwy'r o flaen eu gwell.

Gan ddefnyddio adolygiad sy'n seiliedig ar wybodaeth i gynnal ein hymwybyddiaeth sefyllfaol o'r dirwedd troseddau bwyd, byddwn yn canolbwyntio ar y meysydd blaenoriaeth canlynol tan fis Mawrth 2027:

- difwyno ac amnewid cynhyrchion cig oen, cig eidion, a dofednod
- dargyfeirio gwastraff, gan gynnwys trin sgil-gynhyrchion anifeiliaid (ABP) o fewn cadwyni cyflenwi cig coch, dofednod, cynnyrch llaeth a bwyd anifeiliaid
- cadwyni cyflenwi penodol sy'n peri lefelau uchel o risg dilysrwydd i'r DU

Y Gynghrair Fyd-eang ar Droseddau Bwyd

Mae'r NFCU yn aelod o'r Gynghrair Fyd-eang ar Droseddau Bwyd, sef coalisiwn o arweinwyr rhyngwladol sy'n cydweithio i atal, canfod a tharfu ar droseddau bwyd.

Cylchlythyr yr Uned Genedlaethol Troseddau Bwyd i'r diwydiant

Nod ein Cylchlythyr i'r Diwydiant bob chwarter yw:

- tynnu sylw at y prif risgiau a materion a allai fod yn cael effaith ar y diwydiant bwyd
- rhannu arferion gorau er mwyn cryfhau ymateb y diwydiant i droseddau bwyd
- tynnu sylw at waith parhaus yr NFCU

Os ydych chi'n gweithio yn y diwydiant bwyd, ewch ati i fwrw golwg dros y [rhifyn diweddaraf o gylichlythyr yr NFCU i'r diwydiant](#). Gallwch hefyd gofrestru ar gyfer [y cylchlythyr yma](#).

Rhoi gwybod am droseddau bwyd

Gall aelodau o'r cyhoedd a'r rhai sy'n gweithio yn y sector bwyd a diod roi gwybod am droseddau bwyd trwy'r llwyfan [rhoi gwybod am Droseddau Bwyd yn Gyfrinachol](#).

Gall unrhyw un sy'n amau trosedd bwyd roi gwybod amdani'n ddiogel ac yn gyfrinachol i'r Uned. Gallwch [roi gwybod am drosedd bwyd ar-lein](#) neu drwy radffôn ar **0800 028 1180**. Ar gyfer ffonau symudol y tu allan i'r DU neu alwadau o dramor, defnyddiwch **0207 276 8787**.

Sut gall yr NFCU eich helpu chi

Cylchlythyr i'r diwydiant

Bwletin sy'n cael ei anfon bob chwe wythnos yw hwn sy'n tynnu sylw at y risgiau a'r problemau allweddol a all fod yn effeithio ar y diwydiant bwyd, yn rhannu arferion gorau i gryfhau ymateb y diwydiant i droseddau bwyd, ac yn sôn am ein gwaith parhaus.

[Tanysgrifio i'r bwletin.](#)

Adnodd i hunanasesu gwydnwch yn erbyn twyll bwyd

[Adnodd asesu ar-lein](#) yw hwn i roi cymorth, canllawiau a chyngor i fusnesau bwyd ar dwyll bwyd. Bydd yn eich helpu i werthuso eich busnes, a gall nodi meysydd i'w gwella a rhoi cyngor ar sut i fynd i'r afael â thwyll bwyd.

Asesiad manwl o wydnwch yn erbyn twyll

Mae'r cyfweiliad anffurfiol hwn, a gaiff ei gynnal drwy gynhadledd fideo, yn helpu i asesu lefel risg twyll eich sefydliad. Rydym yn gweithio i ddeall eich prosesau presennol ac yn rhoi cyngor pellach ar sut y gallech adeiladu ar y rheiny a'u gwella.

Gallwch drefnu asesiad manwl o wydnwch yn erbyn twyll drwy e-bostio NFCU.Prevention@food.gov.uk.

Canllawiau i fusnesau bach

[Awgrymiadau ar gyfer canfod ac atal troseddau bwyd](#), gan gynnwys rhestr wirio i reolwyr.

Ymarferion bwrdd gwaith

Digwyddiadau hyfforddi rhyngweithiol wyneb yn wyneb yw'r rhain sy'n efelychu digwyddiad twyll bwyd ac sy'n canolbwyntio ar faterion o ran atal troseddau.

Gallwch drefnu digwyddiad hyfforddi wyneb yn wyneb drwy e-bostio NFCU.Prevention@food.gov.uk.

Cysylltu â ni

I gael mwy o wybodaeth am unrhyw un o'r adnoddau rydyn ni'n eu cynnig, sydd am ddim i fusnesau yng Nghymru, Gogledd Iwerddon a Lloegr, cysylltwch ag NFCU.Prevention@food.gov.uk.